

四庫全書

經部

欽定四庫全書

經部

陳氏春秋後傳卷八

九

詳校官監察御史_臣李陽樞

給事中_臣溫常綬覆勘

覆校官庶吉士_臣徐立綱

校對官主簿_臣汪日贊

謄錄監生_臣張鴻恕

欽定四庫全書

春秋後傳卷八

宋 陳傅良 撰

成公

元年春王正月公即位二月辛酉葬我君宣公無冰三

月作邱甲

邱甲何邱自為甲也二十五人為兩四兩為卒卒出

長轂一乘也於甸乎取之於是有甲士

魏武帝孫子甲士三人步

卒七十二人炊子守裝子之

類又二十五人是一乘也

邱十六井也而自為甲

是邱賦一乘也大司馬之制上地家可用三人中地
二家五人下地家二人皆勝兵也必四邱之甸也而
後備一卒出長轂一乘則是從征少而休多也作邱
甲休少而從征多矣

夏臧孫許及晉侯盟于赤棘秋王師敗績于茅戎

戰然後言敗績此不戰何以書敗績言自敗也凡王

有事譏不在諸侯

出居於鄭之類

諸侯有事譏不在臣子

棄其

師之類

則以自致之文書之雖有敵國亦自致也梁亡

齊人殲于遂王師敗績于茅戎無敵國之辭也昔者
伐鄭桓王不言敗績諱之也則曷不為定王諱昔者
討不庭則君子何忍言之於是晉人平戎既拜成矣
劉康公徼戎遂伐之敗焉是故不諱書曰敗績于茅
戎而劉康公但稱師

冬十月

二年春齊侯伐我北鄙夏四月丙戌衛孫良夫帥師及
齊師戰于新築衛師敗績

衛書大夫帥師於是始大夫強也良夫世為卿至林

父出其君入于戚以叛是故雖孔達不言帥師

見文元年

必若良夫而後言帥師

六月癸酉季孫行父臧孫許叔孫僑如公孫嬰齊帥師

會晉卻克衛孫良夫曹公子首及齊侯戰于鞏齊師敗

績秋七月齊侯使國佐如師已酉及國佐盟于袤婁

凡帥非卿不書

據傳文三年晉救江書陽處父不書先僕襄十七年衛伐曹書石買不書

孫蒯雖卿也非元帥亦不書

據傳襄元年圍宋彭城書晉欒黶不書荀偃宣

二年戰大棘書宋華元不書樂呂之類

書四卿是各自帥也會伐不言

帥師此其言帥師何四卿並出各自為帥也自文之季年而無使介至是而無將佐魯三家之勢成矣於是衛未有大夫將書孫良夫曹無大夫書公子首而賞鞏之功晉於是六卿征伐在大夫不獨魯也以四國之臣戰齊君甚矣鞏戰之忿也齊桓合九國之師以臨楚屈完來盟於師桓不欲以臨楚盟屈完也退而盟召陵齊侯使國佐如師進師于袁婁而後盟

國佐且夫屈完不言使而國佐言使屈完不言使而退盟之於召陵以禮於楚子國佐言使而進盟之於袁婁以偪齊君桓公之所不敢而四國之臣敢為之甚矣鞏戰之忿也

八月壬午宋公鮑卒庚寅衛侯速卒取汶陽田冬楚師鄭師侵衛十有一月公會楚公子嬰齊于蜀

凡吾君會諸侯則有大夫得稱其大夫

僖二十五年
莒慶二十六

年衛
甯速苟無諸侯則不以大夫敵吾君是故莒無大夫

則曰莒人

浮來

齊有大夫則曰齊大夫

薳

及高偃盟及

晉處父盟始以大夫敵吾君矣皆不言公以是為齊
晉之譏則諱公焉耳此其曰公會楚公子嬰齊是公
自與嬰齊夷也於楚之會孟公後諸侯至於楚之會
宋公亦後諸侯至魯猶重從楚也公與嬰齊夷楚何
譏焉不足為公諱焉爾是故自屈完以來楚大夫皆
無氏族也而書公子自嬰齊始

丙申公及楚人秦人宋人陳人衛人鄭人齊人曹人邾

人薛人鄆人盟于蜀

此楚公子嬰齊蔡侯許男宋華元陳公孫寧衛孫良夫鄭公子去疾也曷為貶稱人楚大夫初會盟也是故諸侯之大夫復不序晉大夫初會盟則不言公楚大夫初會盟則其言公何公固與嬰齊夷矣無足諱焉爾

三年春王正月公會晉侯宋公衛侯曹伯伐鄭辛亥葬衛穆公二月公至自伐鄭甲子新宮災三日哭

公羊有傳乙

亥葬宋文公夏公如晉鄭公子去疾帥師伐許

鄭初書大夫將也

公至自晉秋叔孫僑如帥師圍棘

公羊有傳

不言叛內言圍皆叛也

大雩晉卻克衛孫良夫伐麇咎如

有傳

冬十有一月晉侯

使荀庚來聘衛侯使孫良夫來聘丙午及荀庚盟

聘而遂盟之於是始

丁未及孫良夫盟鄭伐許

外鄭也其外之何楚之伯鄭人爲之也由齊桓以來
爭鄭於楚桓公卒鄭始朝楚諸夏之服於楚鄭爲亂
階也至辰陵鄭帥諸夏而事楚矣敗晉于邲盟十四
國之君大夫於蜀皆鄭爲之是故外秦而後外鄭微
秦鄭中國無荊禍矣

四年春宋公使華元來聘三月壬申鄭伯堅卒杞伯來
朝夏四月甲寅臧孫許卒公如晉葬鄭襄公秋公至自

晉冬城鄆鄭伯伐許

稱鄭伯說見
桓十三年

五年春王正月杞叔姬來歸仲孫蔑如宋夏叔孫僑如
會晉荀首于穀梁山崩秋大水冬十有一月己酉天王
崩十有二月己丑公會晉侯齊侯宋公衛侯鄭伯曹伯
邾子杞伯同盟于蟲牢

六年春王正月公至自會二月辛巳立武宮

公羊有傳

取鄆

衛孫良夫帥師侵宋夏六月邾子來朝公孫嬰齊如晉
壬申鄭伯費卒秋仲孫蔑叔孫僑如帥師侵宋楚公子
嬰齊帥師伐鄭

楚初書大夫將也自是必圍滅也而後貶人之

冬季孫行父如晉晉欒書帥師救鄭

晉嘗救鄭矣不書

宣十年士會救鄭

於是書救何鄭不服也

鄭自辰陵無役不從楚敗晉于邲盟諸侯之大夫于
蜀再伐許春秋於是狄鄭蟲牢之盟鄭始服而楚人
爭鄭未已也今年救鄭明年合九國之衆以復救鄭
而鄭伯會楚公子成於鄧於是執鄭伯殺行人伯蠲
而鄭不急君晉於是歸鄭伯使鍾儀合晉楚之成矣

七年春王正月麇鼠食郊牛角改卜牛麇鼠又食其角

乃免牛吳伐鄭

有傳

吳初入伐中國也

夏五月曹伯來朝不郊猶三望秋楚公子嬰齊帥師伐鄭公會晉侯齊侯宋公衛侯曹伯莒子邾子杞伯救鄭八月戊辰同盟于馬陵公至自會吳入州來

吳楚之交兵不書

據傳伐楚伐巢伐徐子重七奔命

至是始書之傳

曰是以始大通吳于上國晉人為之也盟于蒲景公

將始會吳吳不至於鍾離而後至盟於雞澤悼公又
逆吳子吳不至於戚而後至吳之為蠻久矣其不敢
自列於諸夏而晉求之急將以罷楚也楚罷晉亦不
復伯矣入州來不可以不錄其始也

冬大雩衛孫林父出奔晉

八年春晉侯使韓穿來言汶陽之田歸之于齊晉欒書
帥師侵蔡公孫嬰齊如莒宋公使華元來聘夏宋公使
公孫壽來納幣晉殺其大夫趙同趙括秋七月天子使

召伯來賜公命冬十月癸卯杞叔姬卒

內女為夫人恒書卒其不言卒者出也杞叔姬嘗出矣則曷為書卒以杞伯之來逆喪則不可以不卒也晉侯使士燮來聘叔孫僑如會晉士燮齊人邾人伐鄭衛人來媵

媵何以書公親與為禮也媵細故也人微者也以微者行細故而公親受之則不可不書也是故苟不親雖改葬惠公隱弗臨不書苟親之雖衛人晉人齊人

來滕書然則滕者無譏與滕必以同姓齊人悖矣

九年春王正月杞伯來逆叔姬之喪以歸公會晉侯齊侯宋公衛侯鄭伯曹伯莒子杞伯同盟于蒲公至自會二月伯姬歸于宋夏季孫行父如宋致女晉人來滕秋七月丙子齊侯無野卒晉人執鄭伯晉欒書帥師伐鄭冬十有一月葬齊頃公楚公子嬰齊帥師伐莒庚申莒潰楚人入鄆

此嬰齊也向也於會蜀稱嬰齊於盟稱人今也於伐

莒稱嬰齊於入鄆稱一人之身俄而進退焉春秋
之於楚無所不盡其辭也莊王之篇圍滅無貶辭莊
王卒春秋志楚強而已矣是故於柏舉戰稱人奔稱
囊瓦

秦人白狄伐晉鄭人圍許城中城

十年春衛侯之弟黑背帥師侵鄭夏四月五卜郊不從
乃不郊五月公會晉侯齊侯宋公衛侯曹伯伐鄭齊人
來媵丙午晉侯孺卒秋七月公如晉

說在文
二年

冬十月

十有一年春王三月公至自晉晉侯使卻犇來聘己丑
及卻犇盟夏季孫行父如晉秋叔孫僑如如齊冬十月
十有二年春周公出奔晉

有傳

周公楚也王卿士雖奔不名必王子也而後名王子
奔必嘗與廢立者也王人奔不言出言出必嘗去位
者也非王人也則不在其國而後不言出

據公孫教
公孫歸父

晉先
蔑

夏公會晉侯衛侯于瑣澤秋晉人敗狄于交剛

中國敗外域皆不書唯晉特書之特書晉者病晉也
楚方聘魯平宋合諸侯之大夫于蜀討陳夏徵舒觀
兵于雒矣而晉區區爭地於羣狄是故宣成之春秋
晉有事於秦楚或略不書而甚詳於滅狄以是為晉
衰也晉之衰諸夏之憂也

冬十月

十有三年春晉侯使卻錡來乞師

外乞師不書必盟主也而後書乞卑詞也見晉之無

以令與國也

三月公如京師

公羊有傳注非是

夏五月公自京師遂會晉侯

齊侯宋公衛侯鄭伯曹伯邾人滕人伐秦

於是戰于麻隧秦師敗績則其但書伐何畧之也自外秦以來秦晉之相加兵皆畧之是故戰于麻隧秦師敗績但書伐秦戰于櫟晉師敗績但書伐晉以為不足詳焉爾

曹伯廬卒于師秋七月公至自伐秦冬葬曹宣公

十有四年春王正月莒子朱卒夏衛孫林父自晉歸于衛秋叔孫僑如如齊逆女鄭公子喜帥師伐許九月僑如以夫人婦姜氏至自齊

夫人婦姜氏有姑之恒稱也若妾姑也則不書氏是故有成風則出姜不氏有敬嬴則穆姜不氏所以別嫡姑也

冬十月庚寅衛侯臧卒秦伯卒

十有五年春王二月葬衛定公三月乙巳仲嬰齊卒

公羊

有傳癸丑公會晉侯衛侯鄭伯曹伯宋世子成齊國佐邾

人同盟于戚晉侯執曹伯歸于京師

凡例非是說在章指

執未有稱爵者此其稱晉侯何討有罪也曹伯之罪
不著于春秋曷為以討辭書之曹伯殺太子而自立
者也然則負芻之罪曷不著於春秋曹伯廬卒未有
即位者公子與太子爭立猶兩下相殺而已矣書殺
太子是有二尊也猶兩下相殺而已矣則其討之何
不討之則嫡庶之亂將接迹于天下矣是故特書晉

侯

公至自會夏六月宋公固卒楚子伐鄭秋八月庚辰葬

宋共公宋華元出奔晉宋華元自晉歸於宋

洞林本不復出宋華

元

宋殺其大夫山

有傳

於是華元使華喜公孫師帥國人攻蕩氏殺子山則何以稱國稱國殺無罪之辭也蕩澤弱公室則曷為例之以無罪不氏所以別其非無罪也不氏所以別其非無罪也則稱國有司法守之辭也

宋魚石出奔楚

於是魚石向為人鱗朱向帶魚府出奔楚則其但書
魚石何凡奔必有罪也衆不可以勝罪則罪此甚焉
魚石以楚師伐宗國入彭城為宋患之日久是以甚
魚石也

冬十有一月叔孫僑如會晉士燮齊高無咎宋華元衛
孫林父鄭公子鮑邾人會吳于鍾離

晉初以諸侯之大夫會吳也傳曰始通吳也於是大

夫自為會矣殊會齊桓公所以尊王世子也齊桓公以殊會會王世子厲公以殊會會吳吳之為蠻久矣而與王世子同文甚矣厲公之為中國患也

許遷于葉

於是楚公子申遷許于葉則其曰許遷于葉何以其從夷狄雖遷之猶自遷也是故遷于夷以公子棄疾遷于白羽以王子勝皆以自遷之文書之

十有六年春王正月雨水冰

穀梁有傳

夏四月辛未滕子卒

鄭公子喜帥師侵宋六月丙寅朔日有食之晉侯使欒

黶來乞師甲午晦晉侯及楚子鄭伯戰于鄢陵楚子鄭

師敗績

二傳同楚不言師從公穀

楚殺其大夫公子側秋公會晉侯

齊侯衛侯宋華元邾人于沙隨不見公

穀梁有傳

公至自會

公會尹子晉侯齊國佐邾人伐鄭

會伐未有書王人者此其書尹子何初以王卿士與

伐也春秋不以諸侯用王師雖齊桓不得與單伯序

也陽處父之救江也王叔桓公不書雖前年伐秦之

役劉子成子猶不書也於是厲公恣矣初以尹子與齊國佐邾人序甚矣厲公之無道也

曹伯歸自京師

執君不名歸然後名之此其不名何以京師釋之也負芻有罪矣而京師釋之則異於他歸者矣不名之可也

九月晉人執季孫行父舍之于荇邱冬十月乙亥叔孫僑如出奔齊十有二月乙丑季孫行父及晉卻犇盟于

扈公至自會乙酉刺公子偃

刺公子偃殺有罪之辭也

從啖氏

公子買戍衛不卒戍

刺之殺無罪之辭也春秋序事而不言故言故皆譏也

十有七年春衛北宮括帥師侵鄭夏公會尹子單子晉侯齊侯宋公衛侯曹伯邾人伐鄭

王人未有書二卿者書二卿皆與伐也

六月乙酉同盟于柯陵

其不指言諸侯何二子與盟也言諸侯則疑於葵邱
狄泉之盟諱王子虎於是不諱曷為不諱會伐未有
書王人者唯晉厲公特書之會盟不足諱焉爾是故
書同盟其尹子之盟與抑厲公之盟與莫適為主之
辭也

秋公至自會齊高無咎出奔莒九月辛丑用郊晉侯使
荀瑩來乞師冬公會單子晉侯宋公衛侯曹伯齊人邾
人伐鄭十有一月公至自伐鄭壬申公孫嬰齊卒于狸

賑十有二月丁巳朔日有食之邾子貜且卒晉殺其大夫卻錡卻犢卻至楚人滅舒庸

此公子橐師也

十有八年春王正月晉殺其大夫胥童庚申晉弑其君州蒲

晉侯孰弑欒書中行偃也晉侯一日而尸三卿又執書偃將殺之而以自禍是故稱國楚商臣殺鬬勃而後弑君晉欒書中行偃殺胥童而後弑君春秋不列

於孔父以是為不能與其君存亡者也然則書晉殺胥童不書楚殺鬬勃何也書殺胥童以累州蒲也不書殺鬬勃不以累顓也州蒲稱國以弑而弑顓斥商臣二君之所以異也是故弑不言故弑而言故有自來者矣晉殺其大夫卻錡卻犇卻至晉殺其大夫胥童晉弑其君州蒲蔡殺其大夫公子駟蔡放其大夫公孫獵盜殺蔡侯申春秋書弑未有詳於此者也

齊殺其大夫國佐公如晉夏楚子鄭伯伐宋宋魚石復

入于彭城

奔大夫復不書

據文十一年宋蕩意諸昭五年秦后子之類

莊閔而上有

書歸若入者矣則皆不書奔者也

鄭突曹赤齊小白蔡季許叔魯季子

之類

奔而言歸自衛元咺始元咺訟其君者也雖然歸

猶言自也若宋魚石晉欒盈是賊而已矣是故魚石不言自楚欒盈不言自齊

公至自晉晉侯使士勾來聘秋杞伯來朝八月邾子來朝築鹿囿己丑公薨于路寢冬楚人鄭人侵宋

此楚公子嬰齊

也晉侯使士魴來乞師十有二月仲孫蔑會晉侯宋公衛侯邾子齊崔杼同盟于虛朶

崔杼嘗奔衛不言歸其再見何齊納以為大夫也向也曰崔氏今日崔杼則已為大夫也齊之禍靈公為之也前年逐高無咎今年殺國佐而杼當國已而殺高厚齊無世臣矣於是伐莒伐魯皆杼帥師焉而后弑齊之禍靈公為之也

丁未葬我君成公

春秋後傳卷八

欽定四庫全書

春秋後傳卷九

宋 陳傅良 撰

襄公

元年春王正月公即位仲孫蔑會晉欒黶宋華元衛甯

殖曹人莒人邾人滕人薛人圍宋彭城

有傳并公羊穀梁傳

夏晉

韓厥帥師伐鄭仲孫蔑會齊崔杼曹人邾人杞人次于

鄆

會伐未有言次者

據成十六年晉伐鄭諸侯之師次于鄭西我師次于督揚

此其

言次何從晉而未決也悼承厲公之烈盟虛打遂合諸侯討宋魚石爭彭城于楚天下知鄉方矣而五國之大夫猶未以其衆會韓厥之師是有待也亦以見再伯之難也

秋楚公子壬夫帥師侵宋九月辛酉天王崩邾子來朝冬衛侯使公孫剽來聘晉侯使荀瑩來聘

二年春王正月葬簡王鄭師伐宋夏五月庚寅夫人姜氏薨六月庚辰鄭伯踰卒晉師宋師衛甯殖侵鄭秋七

月仲孫蔑會晉荀罃宋華元衛孫林父曹人邾人于戚
已丑葬我小君齊姜叔孫豹如宋冬仲孫蔑會晉荀罃
齊崔杼宋華元衛孫林父曹人邾人滕人薛人小邾人
于戚遂城虎牢楚殺其大夫公子申

三年春楚公子嬰齊帥師伐吳

於是楚伐吳吳人伐楚取駕則其但書伐吳何春秋
於晉楚之際嚴矣於吳楚未嘗無差等也是故楚伐
吳悉書之吳伐楚必若過也門于巢卒而後書

公如晉夏四月壬戌公及晉侯盟于長檮公至自晉六月公會單子晉侯宋公衛侯鄭伯莒子邾子齊世子光己未同盟于雞澤陳侯使袁僑如會戊寅叔孫豹及諸侯之大夫及陳袁僑盟

以大夫盟袁僑晉侯不欲袁僑詘諸侯也雖然有諸侯在而大夫盟於是始晉悼公為之也諸侯在焉而大夫自為盟而後大夫專盟矣大夫專盟自宋始

餘從

梁穀

秋公至自會冬晉荀罃帥師伐許

四年春王三月己酉陳侯午卒夏叔孫豹如晉秋七月
戊子夫人妣氏薨葬陳成公八月辛亥葬我小君定姒
冬公如晉陳人圍頓

五年春公至自晉夏鄭伯使公子發來聘叔孫豹卽世
子巫如晉有傳仲孫蔑衛孫林父會吳于善道秋大雩楚
殺其大夫公子壬夫

傳曰君子謂楚共王於是不刑莊王卒以大夫盟諸

侯納宋魚石殺公子側公子申公子壬夫楚遂不競
而晉復霸是故晉悼公之春秋楚有諸侯之事亦不
悉書也於襄三年公子何忌侵陳不書四年彭名侵
陳不書

公會晉侯宋公陳侯衛侯鄭伯曹伯莒子邾子滕子薛
伯齊世子光吳人鄫人于戚

於是盟于戚吳初與諸侯盟也不書盟為晉諱也吳
晉之盟春秋終諱之

見哀十三年

蒲之役將始會吳吳不

至

事在成九年傳

雞澤之役又逆吳子吳子不至吳固不敢

自列於諸夏也而晉求之急吳始稱入序于鄙人之

上於是至相

十年

又殊會之晉厲公以殊會會吳未足

為中國患也悼公復以殊會會吳吳於是滅州來敗
頓胡沈蔡陳許之師滅巢入郢矣

公至自會冬戍陳

戍不書

桓六年戍齊宣十年戍鄭之類

晉悼公之戍陳鄭也特書之

君子以悼公之伯業桓文之所不屑為也桓公不戰

而屈楚文公戰而屈楚自悼公而通吳以制楚矣會
于戚于向于柎皆東竟也而又戍陳鄭以守之楚誠
強而晉亦誠下策也

楚公子貞帥師伐陳公會晉侯宋公衛侯鄭伯曹伯齊
世子光救陳

書救陳何陳不服也陳自辰陵不與諸夏之會三十
年矣悼公伯而雞澤之盟素僑至戚之會陳侯至諸
侯為之戍陳而楚有公子貞之師于是救陳又明年

會于鄆陳侯逃歸自是凡會同無陳矣

十有二月公至自救陳辛未季孫行父卒

六年春王三月壬午杞伯姑容卒

有傳說在章指

夏宋華弱來

奔秋葬杞桓公滕子來朝莒人滅鄆冬叔孫豹如邾季孫宿如晉十有二月齊侯滅萊

七年春鄭子來朝夏四月三卜郊不從乃免牲小邾子來朝城費秋季孫宿如衛八月螽冬十月衛侯使孫林父來聘壬戌及孫林父盟楚公子貞帥師圍陳

楚雖圍國嘗書君將矣於是書大夫楚強甚矣

十有二月公會晉侯宋公陳侯衛侯曹伯莒子邾子于鄆鄭伯髡頑如會未見諸侯丙戌卒于鄆

此公子駢弑其君也則其書卒何以君薨赴也

本杜預

君弑矣晏然訃於他國但如恒喪自鄭駢始甚矣無人紀也而鄭之臣子聽焉自有討賊至于不討自不討矣至於赴告如恒喪春秋之所甚懼也是故書卒所以誅鄭之臣子聽賊之所為也夫春秋之法苟有

逆意于其君雖自殺也

據楚
顧度

亦書弑此弑也吾從而

卒之則何以傳信于萬世不卒之無以著鄭人之心也崔杼弑其君齊太史書之杼殺之其弟嗣書之南史執簡以往陳恒弑其君孔子沐浴而朝告於哀公曰請討之弑君天下之大變也名在諸侯之策誰能沒之史見其事春秋著其心則後世有考焉矣

陳侯逃歸

八年春王正月公如晉夏葬鄭僖公鄭人侵蔡獲蔡公

子變

有穀
梁傳

此鄭公子發也貶人之

季孫宿會晉侯鄭伯齊人宋人衛人邾人于邢邱

有傳

此齊高厚宋向戌衛甯殖也其稱人何不以大夫敵
盟主也不以大夫敵盟主桓文之盛也自同盟于戚
而大夫與諸侯序矣於是再見其再見何復予晉以
伯也傳曰大夫不書尊晉侯也

公至自晉莒人伐我東鄙秋九月大雩冬楚公子貞帥

師伐鄭晉侯使士匄來聘

九年春宋災夏季孫宿如晉五月辛酉夫人姜氏薨秋
八月癸未葬我小君穆姜冬公會晉侯宋公衛侯曹伯
莒子邾子滕子薛伯杞伯小邾子齊世子光伐鄭十有
二月己亥同盟于戲楚子伐鄭

十年春公會晉侯宋公衛侯曹伯莒子邾子滕子薛伯
杞伯小邾子齊世子光會吳于柤夏五月甲午遂滅偃
陽

傳曰言自會也滅貶人之此其不申言晉人何楚滅

嘗稱君矣自楚滅稱君

事在宣十二年

苟君將也則皆書君

是故滅萊書齊侯滅偃陽書晉侯自楚滅稱大夫

在事

二十五年

苟大夫將也則皆書大夫是故滅陸渾之戎書

晉荀吳滅沈書蔡公孫姓滅許書鄭游速自是終春

秋滅不書君大夫者吳也是經之變文也於是以偃

陽子歸不書宥偃陽子也悼公合十三國之衆為衣

裳之會而遂滅偃陽於偃陽子何譏焉夫子之刪詩

也存邲鄘於國風之首而繫檜曹于末錄小國也春秋元錄小國也是故滅君有奔不言奔以歸不言以歸者以是為非其罪也

據昭十七年陸渾子奔楚不書奔

公至自會楚公子貞鄭公孫輒帥師伐宋

凡專將言帥師苟二國會則先序主兵者而不言帥

師言帥師是國自為帥也國自為帥自楚公子貞鄭

公孫輒始自是雖圍滅亦並稱帥師矣

事在定十四年哀三年

晉師伐秦

此荀瑩也曷為貶書師秦晉之師非會伐皆不書大夫

秋莒人伐我東鄙公會晉侯宋公衛侯曹伯莒子邾子齊世子光滕子薛伯杞伯小邾子伐鄭冬盜殺鄭公子

駢公子發公孫輒

有傳

盜賊者也以賤者而一日殺三卿鄭之失政甚矣書盜自此始傳曰言無大夫焉春秋之季小臣圖柄其甚者陪臣執國命矣是故衛周治殺元咺宋穆襄之

族帥國人殺公孫固公孫鄭雖賤者也猶未書盜必
若鄭五子而後書盜諸侯貶書人聽諸侯之辭也大
夫貶書人聽大夫之辭也書盜則聽不止大夫矣春
秋所甚不得已也

戍鄭虎牢

有傳

向也曰虎牢今也曰鄭虎牢何不繫之鄭者為天下
城之也繫之鄭者為鄭戍之也是故楚邱不繫之衛
緣陵不繫之杞梁山沙鹿不繫之晉皆非一國之辭

也邾鄆郛繫之紀彭城繫之宋皆一國之辭也

楚公子貞帥師救鄭

楚數救鄭矣不書

見傳宣元年為賈二年闕叔成九年子重十六年楚子十七年子重

公子申之類

於是始書以為晉悼復伯楚欲救而不能也

是故書救陳見晉之終失陳書救鄭見楚之終失鄭

云爾

公至自伐鄭

十有一年春王正月作三軍

有傳

於是季武子作三軍非公命也向也新作南門非公命不書此何以書作南門常事作三軍非常也是故必常事譏不及公則不書苟非常則謹書之書作三軍志三家之分公室也立武宮立煬宮雖非公命皆非常也

夏四月卜郊不從乃不郊鄭公孫舍之帥師侵宋公會晉侯宋公衛侯曹伯齊世子光莒子邾子滕子薛伯杞伯小邾子伐鄭

隱桓之諸侯皆序爵也伯者作而後小國或序大國
之上有以子男長於伯者矣於是以世子長於小國
之君則悼公為之也

十年伐鄭長於
滕至是長於莒

秋七月己未同盟于亳城北公至自伐鄭楚子鄭伯伐
宋公會晉侯宋公衛侯曹伯齊世子光莒子邾子滕子

薛伯杞伯小邾子伐鄭會于蕭魚

公穀
有傳

有地會而後伐者矣

據會于袤伐鄭
會于召陵伐楚

未有伐而後地

會者也地會而後伐未集事之辭也伐而後地會集

事之辭也伐鄭會于蕭魚序績也

公至自會楚人執鄭行人良霄冬秦人伐晉

十有二年春王三月莒人伐我東鄙圍台季孫宿帥師

救台遂入鄆

公穀有傳

夏晉侯使士魴來聘秋九月吳子乘

卒冬楚公子貞帥師侵宋公如晉

十有三年春公至自晉夏取郛

凡例辨在纂例

秋九月庚辰楚

子審卒冬城防

十有四年春王正月季孫宿叔老會晉士勾齊人宋人

衛人鄭公孫薑曹人莒人邾人滕人薛人杞人小邾人
會吳于向

此齊崔杼宋華閱衛北宮括也其特書人何傳曰情
也則不親事于會也向之會悼德衰矣數吳之不德
以退吳人而卒會吳執莒公子務婁以其通楚使也
而卒會莒諸侯之大夫從晉侯伐秦而悼不自將諸
侯之師及涇不濟荀偃禦一帥爭而大眾還晉人
謂之遷延之役是故伐秦之役不書晉侯志晉侯之

怠也則諸侯之大夫有不親事於會者矣有伯者之令而大夫不親事於是始悼公為之也自是會于澶淵晉趙武宋向戌不書書鄭良霄於城杞鄭游吉不書書公孫段則君令多不行於大夫矣

三月乙未朔日有食之夏四月叔孫豹會晉荀偃齊人宋人衛北宮括鄭公孫蠆曹人莒人邾人滕人薛人杞人小邾人伐秦

荀偃嘗弑君矣偃書會伐如他大夫無貶焉然則偃

無罪歟以陳佗之罪不著于春秋有殺之者則予之
以討賊之辭則偃罪不容誅矣其再見猶趙盾焉爾
己未衛侯出奔齊莒人侵我東鄙秋楚公子貞帥師伐
吳冬季孫宿會晉士勾宋華閱衛孫林父鄭公孫蠆莒
人邾人于戚

襄昭之際大夫無君之禍晉為之也悼公之德衰矣
十有五年春宋公使向戌來聘二月己亥及向戌盟于
劉劉夏逆王后于齊

單靖公不行也

夏齊侯伐我北鄙圍成公救成至遇

公羊有傳

自宣之季年內不言君將於是書救成而不敢進無惑乎三家之專魯也

季孫宿叔孫豹帥師城成郛秋八月丁巳日有食之邾人伐我南鄙冬十有一月癸亥晉侯周卒

十有六年春王正月葬晉悼公三月公會晉侯宋公衛侯鄭伯曹伯莒子邾子薛伯杞伯小邾子于溴梁戊寅

大夫盟

公羊有傳

凡伯在焉而但曰諸侯者無伯也

文十五年盟扈十七年會扈

君

在焉而但曰大夫者無君也是故自文而下則有斥言諸侯而不序自襄而下則有斥言大夫而不序

晉人執莒子邾子以歸齊侯伐我北鄙夏公至自會五

月甲子地震叔老會鄭伯晉荀偃衛甯殖宋人伐許

有傳

鄭非主兵也則曷為會鄭伯春秋不以大夫主諸侯則推而屬之鄭也春秋之大義夷夏之辨君臣之分

而已是故陳非主盟也不以夷狄主中國則書會陳

事在僖十九年

鄭非主兵也不以大夫主諸侯則書會鄭

秋齊侯伐我北鄙圍成大雩冬叔孫豹如晉

十有七年春王二月庚午邾子貜卒宋人伐陳

莊朝宋微者也曷為得書人微者唯討賊得書人大

夫交征于中國而後微者書人是故鄭皇武書

成十八年

宋莊朝書甚者秦庶長鮑越常壽過書

夏衛石買帥師伐曹秋齊侯伐我北鄙圍桃高厚帥師

伐我北鄙圍防九月大雩宋華臣出奔陳冬邾人伐我南鄙

十有八年春白狄來夏晉人執衛行人石買秋齊師伐我北鄙冬十月公會晉侯宋公衛侯鄭伯曹伯莒子邾子滕子薛伯杞伯小邾子同圍齊

同圍齊不但晉志也自圍齊之後晉師無君將雖大夫之師出無與於諸夏之義矣

曹伯負芻卒于師楚公子午帥師伐鄭

十有九年春王正月諸侯盟于祝柯

會無王卿士其亦申言諸侯何間有事也

晉人執邾子公至自伐齊取邾田自鄆水季孫宿如晉

葬曹成公夏衛孫林父帥師伐齊秋七月辛卯齊侯環

卒晉士匄帥師侵齊至穀聞齊侯卒乃還有公羊傳八月丙

辰仲孫蔑卒齊殺其大夫高厚有傳鄭殺其大夫公子嘉

有傳冬葬齊靈公城西郭叔孫豹會晉士匄于柯城武城

二十年春王正月辛亥仲孫速會莒人盟于向夏六月

庚申公會晉侯齊侯宋公衛侯鄭伯曹伯莒子邾子滕
子薛伯杞伯小邾子盟于澶淵秋公至自會仲孫速帥
師伐邾蔡殺其大夫公子變有傳蔡公子履出奔楚陳侯
之弟黃出奔楚傳非是叔老如齊冬十月丙辰朔日有食
之季孫宿如宋

二十有一年春王正月公如晉邾庶其以漆間邱來奔
有傳

於是公猶在晉季孫宿內之也向者莒太子僕弑其

君以其寶玉來奔納諸宣公矣季文子使司寇出諸
竟則不書公猶在晉而季孫宿納庶其則何以書春
秋誅叛人君臣之責也是故苟不納之雖有公命不
書苟納之雖無公命必謹而書之

夏公至自晉秋晉欒盈出奔楚九月庚戌朔日有食之
冬十月庚辰朔日有食之曹伯來朝公會晉侯齊侯宋
公衛侯鄭伯曹伯莒子邾子于商任

左曰銅
欒氏也

二十有二年春王正月公至自會夏四月秋七月辛酉

叔老卒冬公會晉侯齊侯宋公衛侯鄭伯曹伯莒子邾
子薛伯杞伯小邾子于沙隨

左曰復錮
藥氏也

公至自會楚殺

其大夫公子追舒

二十有三年春王二月癸酉朔日有食之三月己巳杞
伯勾卒夏邾畀我來奔葬杞孝公陳殺其大夫慶虎及
慶寅

於是陳侯如楚公子黃愬二慶於楚楚人召之慶氏
以陳叛屈建從陳侯圍陳遂殺慶虎慶寅故春秋未

書叛而稱國以殺猶是殺大夫焉爾叛必不能殺者也

陳侯之弟黃自楚歸于陳晉欒黶復入于晉入于曲沃秋齊侯伐衛遂伐晉

此其書遂何齊始伐盟主也自衮婁以來齊世從晉於是始叛則晉伯之衰而諸侯貳矣晉之衰諸夏之憂也

八月叔孫豹帥師救晉次于雍榆

次而救匿其救之形也救而次宣其救之聲也書救
晉何晉遂失伯也以區區之魯何救於晉則晉遂失
伯非魯故也書救晉則天下益多故矣盟于宋而南
北之勢成會于申而淮夷至戰于雞父而吳之敗者
六國於越入吳春秋終焉蓋於是焉始故謹而書之
也是故自救盟主他救皆不書

據傳昭二十一年晉以諸侯之師救宋三

十年楚沈尹戌救徐之類

己卯仲孫速卒冬十月乙亥臧孫紇出奔邾晉人殺欒

盈有傳公
羊同

討亂不書殺欒盈何以書討亂常事殺欒盈非常也
欒盈亡大夫爾則曷為謂之非常晉為盟主而再合
諸侯于商任于沙隨以錮欒氏則是非常也盈之入
也晉人大懼奉君以走固宮而盈以曲沃之甲乘公
門矢及君屋蓋僅焉克之而已書殺欒盈猶州吁無
知是非常之辭也雖然欒盈復不言自錮亂臣也則
以討賊之辭書之鄭良霄言自曷為書之如欒盈良

霄雖亡大夫爾鄭伯為之盟大夫盟國人良霄自墓門之瀆入因馬師頡介于襄庫以伐舊北門書殺良霄如書殺欒盈亦非常之辭也甚矣文公而下諸侯無政大夫強也

齊侯襲莒

二十有四年春叔孫豹如晉仲孫羯帥師侵齊夏楚子伐吳秋七月甲子朔日有食之既齊崔杼帥師伐莒大水八月癸巳朔日有食之公會晉侯宋公衛侯鄭伯曹

伯莒子邾子滕子薛伯杞伯小邾子于夷儀冬楚子蔣
侯陳侯許男伐鄭公至自會陳鍼宜咎出奔楚叔孫豹
如京師大饑

二十有五年春齊崔杼帥師伐我北鄙夏五月乙亥齊
崔杼弑其君光

宋萬魯慶父奔而後得誅之則不書殺以是為佚賊
也齊滅崔氏而尸杼於市則何以亦不書殺均之為
佚賊也崔杼弑君偃然猶在位也而以家禍亡其宗

如是而得書則臣子之不誠於君父者可以盜名矣
是故鄭人斲公子歸生之棺而葬靈公齊人暴崔杼
之尸而葬莊公春秋終不書葬則猶不葬也

公會晉侯宋公衛侯鄭伯曹伯莒子邾子滕子薛伯杞
伯小邾子于夷儀六月壬子鄭公孫舍之帥師入陳秋
八月己巳諸侯同盟于重邱

會無王人亦申言諸侯義同祝柯

公至自會衛侯入于夷儀

奔君恒名之此其不名何伯逆之也故書曰晉侯會
于夷儀衛侯入于夷儀衛侯失國矣而伯納之則異
於他入者矣不名之非失國之辭也是故奔稱衛侯
衍有晉逆之則稱衛侯奔稱北燕伯欸有齊納之則
稱北燕伯衛有二君俄而甯喜之弑械成則晉人為
之也何謂二君衍入稱侯剽弑稱君是二君也國無
二尊春秋之法也是故鄭厲公入則忽雖嘗謂之昭
公晉文公入則圉雖嘗謂之懷公皆不書殺以是為

失國之君爾而書殺是有二尊也今夫衍列於諸侯之會十有三而後出其入也將焉名之剽列於諸侯之會七而後弑其弑也又將焉名之削一而存一是有予奪矣春秋不沒其實而正不正不與存焉故必若鄭忽晉圉則春秋所得而廢苟若剽衍則春秋所不得而廢

杜氏蘇氏以鄭伯遇于垂為鄭子儀非是當從胡氏

楚屈建帥師滅舒鳩

楚雖滅國嘗稱君將矣於是書大夫楚強也自是滅

國晉書荀吳蔡書公孫姓鄭書游速滅不稱人矣滅
不書大夫者吳也吳無大夫也

冬鄭公孫夏帥師伐陳十有二月吳子遏伐楚門于巢
卒

自入州來至是而書伐楚略之也於是吳子親門于
巢巢牛臣隱於短垣以射之則其但書門于巢卒何
不以咎巢人也諸樊始通于上國爭長于楚而喪身
于匹夫是自取之也

本何休

二十有六年春王二月辛卯衛甯喜弑其君剽

有傳

道喜弑者公子鱣也則其專罪喜何喜為正卿喜不
有無君之心則鱣為僂矣

衛孫林父入于戚以叛

有傳

宋魚石入于彭城晉欒盈入于曲沃未可以書叛必
若衛孫林父而後可以書叛書叛必不能討者也

據二

十九年季札過衛將宿于戚聞鐘聲焉

春秋之季家有藏甲邑有百雉

之城矣故書叛始于此凡叛賤者不書必卿佐而後

書

據傳成十七年齊高無咎之子弱以盧叛
襄二十九年齊高止之子堅以盧叛之類

甲午衛侯衎復歸于衛

有傳

鄭伯雖在櫟嘗與諸侯會于垂則君國矣是故殺忽
不書殺子亹不書殺子儀不書以三子之不書殺知
鄭伯之已定也以剽之書弑知衛侯之猶未定也是
故衎再見而後名之鄭伯突入于櫟不曰鄭伯突復
歸于鄭此其書復歸何弑剽而後得國也

夏晉侯使荀吳來聘公會晉人鄭良霄宋人曹人于澶

淵

左曰尊公非是

秋宋公殺其世子痤晉人執衛甯喜

凡執他國之臣必命大夫而後書

據執甯喜北宮遺但書甯喜十八年

執石買孫蒯但書石買之類

於是執甯喜以歸衛侯如晉復執之

則其但書甯喜何是之謂筆削也宋人執祭仲亦執厲公但書祭仲晉人執甯喜亦執獻公但書甯喜苟書執鄭突是不以逐君之罪罪宋也書執衛侯衎是以討賊之義予晉也不以逐君之罪罪宋以討賊之義予晉則放乎利而盜名者得志矣

八月壬午許男甯卒于楚冬楚子蔡侯陳侯伐鄭葬許靈公

二十有七年春齊侯使慶封來聘夏叔孫豹會晉趙武楚屈建蔡公孫歸生衛石惡陳孔奐鄭良霄許人曹人于宋

晉楚初同主諸夏盟也晉楚嘗盟矣會于瑣澤之歲宋華元克合晉楚之成士燮會公子罷盟于宋西門之外不書猶曰特相盟也兩君之好而非天下之

大變也以諸侯分為晉楚之從而交相見也於是始則是南北二伯也天下之大變也於溴梁而無君臣之分於宋而無內外之辨昭定哀之春秋將以終于吳越焉爾矣

衛殺其大夫甯喜

甯喜猶晉里克也是故衛剽亦不書葬

衛侯之弟鱄出奔晉秋七月辛巳豹及諸侯之大夫盟

于宋

有傳

於是晉楚爭先乃先楚人則其書先晉何春秋不以
荆蠻先中國也自宋以來晉不專主盟矣號之盟讀
舊書加於牲上而已至鄆陵則齊主諸侯至臯鼫則
魯及諸侯晉之不足以主夏盟自宋始宋之盟趙孟
之偷也孔子曰庭燎之百由齊桓公始也大夫之奏
肆夏由趙文子始也是王霸之所以興衰也豹云者
蒙上文也僑如以夫人至自齊媾至自晉皆蒙上文
也

冬十有二月乙亥朔日有食之

二十有八年春無冰夏衛石惡出奔晉邾子來朝秋八月大雩仲孫羯如晉冬齊慶封來奔十有一月公如楚於是公及宋公陳侯鄭伯許男如楚諸夏之君旅見於楚始於此舉魯以見其餘也外相如不志有異焉則志之是故書齊侯鄭伯如紀可以書齊侯鄭伯如紀曷為不書公及宋公陳侯鄭伯許男如楚凡舉魯以見其餘者則天下之辭也公朝于王所公如楚於

以見王伯之盛衰故曰此天下之辭也

十有二月甲寅天王崩乙未楚子昭卒

二十有九年春王正月公在楚

穀梁有傳

吾君嘗以正月在齊晉矣

據莊二十二年公如齊二十三年春至自齊文三年

公如晉四年春至自晉之類

不書書在楚危在楚也

本何休

夏五月公至自楚庚午衛侯衍卒閭弒吳子餘祭

凡稱國以弒者必其臣子也稱人者非但其臣子也猶曰衆人弒之焉爾以為臣子則賤者也以為衆人

則匹夫也。於是有稱閭者焉，稱盜者焉。閭所狎也，盜所疏也。閭身受其咎，盜有受其咎者矣。

仲孫羯會晉荀盈、齊高止、宋華定、衛世叔儀、鄭公孫段、曹人莒人邾人滕人薛人小邾人城杞。

會盟必有故也。春秋書會盟而不言故，屬辭比事而功過分矣。於是書城杞，是合十二國諸侯之大夫為悼夫人也。於澶淵書宋災，是合十三國諸侯之大夫為共姬也。衛甯喜弑其君孫林父，以邑叛蔡世子般。

弑其父吳楚之大夫交聘於中國天下亦多故矣晉
為盟主而區區於宋杞是晉之已細也晉之已細然
後有執齊慶封放陳招殺蔡侯般假討賊之義以盟
諸夏者如楚靈王者矣

晉侯使士鞅來聘杞子來盟

傳曰書曰子賤之也凡來盟皆大夫也杞伯親之故

賤之也杞雖稱子矣

僖二十三年

前乎此夷儀之會稱伯

後乎此卒復稱伯來盟特稱子見春秋之貶諸侯也

春秋之褒貶君大夫莫備於隱桓莊之世寓王法也
成襄而下舍杞子無削其爵者舍楚子虔無生名之
者經之變文也

吳子使札來聘

荆人來聘楚子使椒來聘秦人來歸僖公成風之襚
秦伯使術來聘春秋蓋累而後進之也吳始通於上
國則曷為書是大夫吳驟強也然則非賢札歟書札
猶楚椒秦術則皆非命大夫之辭也必若屈完而後

特書氏春秋公萬世之是非不以私一人也

秋九月葬衛獻公齊高止出奔北燕

於是公孫薑公孫竈放高止於北燕左曰書曰出奔
罪高止也春秋之法苟不足以免於罪雖放逐也以
自奔書之是故魯出叔孫僑如齊逐高無咎放高止
但書奔而已矣

冬仲孫羯如晉

三十年春王正月楚子使薳罷來聘夏四月蔡世子般

弑其君固五月甲午宋災宋伯姬卒天王殺其弟佞夫

凡王殺不書

本何休據傳莊王殺周公黑肩敬王殺召伯盈尹固之類

雖王子不

書

據惠王殺子類

甚者母弟亦不書

據襄王殺母弟帶

必殺無罪也

而後書於是靈王崩景王立儋括欲立王子佞夫佞夫弗知也尹氏劉氏殺佞夫括奔晉傳曰天王殺其弟佞夫罪在王也

王子瑕奔晉

王子奔不書

據桓十八年王子克僖十二年王子帶之類

必嘗叛者也為

天子諱叛也子瑕欲廢景王者之黨也則曷為不諱於是書天王殺其弟佞夫奔不足諱也

秋七月叔弓如宋葬宋共姬鄭良霄出奔許自許入于鄭鄭人殺良霄冬十月葬蔡景公晉人齊人宋人衛人鄭人曹人邠人滕人薛人杞人小邾人會于澶淵

宋災故

有傳

諸侯之大夫不序自蜀盟以來未有也於是叔孫豹會晉趙武齊公孫蠆宋向戌衛北宮佗鄭罕虎則其

復不序何晉不足以為盟主也晉之不足以主盟自
宋始必再言故而後貶重絕晉也凡諸侯不序吾君
在焉而書吾君大夫不序吾大夫在焉而書吾大夫
與有譏也

據文七年公會諸侯晉大夫盟于扈九年公子遂會晉人宋人衛人許人救鄭


在魯矣則不書吾君大夫傳曰不書魯大夫諱之也
三十有一年春王正月夏六月辛巳公薨于楚宮秋九
月癸巳子野卒巳亥仲孫羯卒冬十月滕子來會葬
諸侯來會葬於是始改葬惠公也衛侯來會葬隱公

不見春秋之初魯猶秉禮也晉景公之喪成公弔焉亦已卑矣晉于是止公使送葬諸侯莫在魯人辱之雖伯主未有君會葬者也葬楚康王也公及陳侯鄭伯許男送於西門之外則天下諸侯有會葬於楚者矣於是滕會葬於魯是春秋之季也會葬猶可奔喪甚矣

癸酉葬我君襄公十有一月莒人弑其君密州

莒子孰弑公子展輿也莒子既立展輿又廢之而以

自禍衆人何罪焉是故稱國凡弑君稱人必衆者也
稱國必大臣貴戚者也經衍一人字



春秋後傳卷九

欽定四庫全書

經部

陳氏春秋後傳卷

十二

詳校官監察御史_臣李陽械

給事中_臣溫常綬覆勘

覆校官庶吉士_臣徐立綱

校對官中書_臣汪日贊

謄錄監生_臣張鴻恕

欽定四庫全書

春秋後傳卷十

宋 陳傅良 撰

昭公

元年春王正月公即位叔孫豹會晉趙武楚公子圍齊國弱宋向戌衛齊惡陳公子招蔡公孫歸生鄭罕虎許人曹人于虢三月取鄆

於是季孫宿伐莒取鄆則書法何以異于公孫歸父

事在宣

十年 歸父伐邾猶公命也專取邑而已

夏秦伯之弟鍼出奔晉六月丁巳邾子華卒晉荀吳帥師敗狄于大鹵

晉自悼公以來狄師不出敗狄至是而再見其再見何晉彌衰也悼公之伯也魏絳諫曰勞師于戎而楚伐陳必弗能救是棄陳也諸華必叛戎禽獸也獲戎失華毋乃不可乎悼公卒復有事于戎狄至伐鮮虞春秋遂狄晉矣

秋莒去疾自齊入于莒

前言齊無知弒其君後言小白入于齊前言莒人弒其君後言去疾入于莒則不與弒之辭也前言衛侯入于夷儀後言衛甯喜弒其君前言齊陽生入於齊後言齊陳乞弒其君與弒之辭也辭有先後罪有小大故曰屬辭比事春秋教也

莒展輿出奔吳

展輿嘗弒君矣其君稱國以弒則展輿無罪歟以陳佗之罪不著於春秋有殺之者則予之以討賊之辭

則展輿罪不容誅矣其再見猶荀偃焉爾是故雖踰年不成君書名

叔弓帥師疆鄆田葬邾悼公冬十有一月己酉楚子麇卒

此公子圍弑其君則其書卒何以君薨赴也君弑矣晏然赴於他國之君如恒辭猶鄭駢也而其臣子聽焉相與設應為後之辭甚矣無人紀也從而書卒所以誅楚之臣子聽賊之所為也圍之未弑也魯蔡鄭

之大夫固知之矣會于申以齊慶封徇於諸侯曰無
或如齊慶封弑其君弱其孤以盟其大夫慶封曰無
或如共王之庶子圍弑其君兄之子麋而代之以盟
諸侯軍人粲然皆笑史見其事春秋著其心則後世
有考矣

楚公子比出奔晉

二年春晉侯使韓起來聘夏叔弓如晉秋鄭殺其大夫
公孫黑冬公如晉至河乃復季孫宿如晉

三年春王正月丁未滕子原卒夏叔弓如滕五月葬滕成公秋小邾子來朝八月大雩冬大雨雹北燕伯款出奔齊

四年春王正月大雨雹夏楚子蔡侯陳侯鄭伯許男徐子滕子頓子胡子沈子小邾子宋世子佐淮夷會于申楚初專合諸侯也齊桓卒楚宋嘗爭長矣敗于城濮楚師不出者八年晉志不在諸侯而後楚莊盟于辰陵以莊王之賢從之者陳鄭焉耳申之會合十有二

國楚之得志於中國未有盛於此時者也

楚人執徐子

凡外域交相執不書

據文十二年楚執舒子平昭三十年吳執鍾吾子

書執

徐子危會申之諸侯也自宋之盟中國無大會越九年而十二國之君皆受命於楚楚於是不殊淮夷執徐子不殊淮夷執徐子將以威中國也是故其交相執不志為中國危之故志之也

秋七月楚子蔡侯陳侯許男頓子胡子沈子淮夷伐吳

執齊慶封殺之遂滅賴

執齊慶封何以伐吳慶封再奔吳吳子之朱方此執

有罪也則曷為不再言楚子

據會于戚晉侯執曹伯再言晉侯

不予

楚以討齊慶封之辭也

從穀梁

猶曰諸侯執之云爾申

之會夷夏之大變也宋虢之事猶曰二伯至是而楚

始專合諸侯

范甯靈王始會諸侯

訖於厥慙諸夏無會同者十

年而楚執齊慶封放陳招殺蔡般假討賊之義以號

于天下由是而滅賴滅陳滅蔡矣

九月取鄆

傳例非是

冬十有二月乙卯叔孫豹卒

五年春王正月舍中軍

傳曰卑公室也公穀非

舍中軍從祀先公皆善辭也微國史無以知舍中軍為季氏專魯從祀先公為陽虎專季氏也然則春秋固不可以無史歟豈惟春秋孔氏之述六經也則以萬世之史筆削之焉爾於書錄康誥不錄唐誥於詩錄鵲巢騶虞不錄豸首其甚彰彰者也史行于天下六經修于聖人萬世之後史與經並衡焉有以考吾

之所去取者矣是孔子之意也春秋固東遷之史也
史曰晉侯召王以諸侯見吾曰天王狩史曰衛甯殖
孫林父出其君吾曰衛侯奔向微國史亦無以見修
春秋之辭也舍中軍從祀先公是季孫宿陽虎之事
魯史云然我何加損焉不沒其實焉爾矣苟其文不
可以不是正則有筆削苟不必是正雖無筆削可也
楚殺其大夫屈申公如晉夏莒牟夷以牟婁及防茲來
奔有傳秋七月公至自晉戊辰叔弓帥師敗莒師于蚡泉

秦伯卒冬楚子蔡侯陳侯許男潁子沈子徐人越人伐吳

初書越而常壽過得稱人越驟強也通吳以疲楚者晉謀之失也通越以困吳者楚謀之失也

六年春王正月杞伯益姑卒葬秦景公夏季孫宿如晉葬杞文公宋華合比出奔衛秋九月大雩楚薳罷帥師伐吳冬叔弓如楚齊侯伐北燕

七年春王正月暨齊平

平不書必關於天下之大故而後書於是燕大夫比
以殺公之外嬖公懼奔齊齊侯伐燕納簡公庶幾乎
天下之大義也而取燕姬與其寶賂而還不書平是
予齊以定燕也靈公以來齊首敗伯主之約納晉欒
盈叛人也納北燕伯猶庶幾乎天下之大義而卒與
之平是黨亂臣逆子也是故昭定而下春秋多罪齊
書伐衛遂伐晉同圍齊襲莒暨齊平盟于鹹次于五
氏皆特筆也夫子曰齊景公有馬千駟死之日民無

得而稱焉蓋不予齊也

三月公如楚叔孫婼如齊涖盟夏四月甲辰朔日有食
之秋八月戊辰衛侯惡卒九月公至自楚冬十有一月
癸未季孫宿卒十有二月癸亥葬衛襄公

八年春陳侯之弟招殺陳世子偃師

兩下相殺雖世子不書

據陳佗
曹負芻

此何以書斥君之辭

也陳侯鮑卒佗殺太子而自立曹伯廬卒負芻殺太
子而自立猶兩下相殺也初哀公元妃生偃師而嬖

二妃屬其子留於公子招公子過哀有廢疾招殺其世子偃師而立留哀公經而死哀有世子矣又屬其嬖子於二公子為是殺世子則譏不但其人也書曰陳侯之弟招殺陳世子偃師陳侯溺卒斥君之辭也夏四月辛丑陳侯溺卒叔弓如晉楚人執陳行人于徵師殺之陳公子留出奔鄭秋蒐于紅

蒐狩不書必違禮而後書於是舍中軍四分公室季氏擇二二子各一皆盡征之而貢于公蒐于紅也自

根牟至於商衛革車千乘皆三家之師也自是而屢
蒐三家所以耀武焉爾是故桓莊之狩必言公昭定
之蒐不言公矣

十一年大蒐于比蒲晉叔向曰
君有大喪國不廢蒐不忌君也

陳人殺其大夫公子過大雩冬十月壬午楚師滅陳執
陳公子招放之于越殺陳孔奐葬陳哀公

九年春叔弓會楚子于陳

於是叔弓及宋華亥鄭游吉衛趙厲會楚子于陳諸
夏之大夫旅見於楚於是始舉魯以見其餘也外會

不志有異焉則志之是故書仲孫蔑衛孫林父會吳
于善道可以書仲孫蔑衛孫林父會吳于善道曷為
不書叔弓宋華亥鄭游吉衛趙厲會楚子于陳凡舉
魯以見其餘者則天下之辭也

許遷于夷夏四月陳災

穀梁有傳

秋仲孫矍如齊冬築郎圃

十年春王正月夏齊藥施來奔秋七月季孫意如叔弓
仲孫矍帥師伐莒

舍中軍矣曷為書三卿帥師四分公室叔弓為意如

貳也

成二年鞏之戰書季孫行父臧孫許叔孫僑如公孫嬰齊蓋二軍之將佐襄十年作三軍而三

分公室三家各將其一昭五年舍中軍而四分公室季氏擇二二子各一於是伐莒叔弓佐意如序於仲孫貜之上而叔孫婁守自是訖春秋魯有四卿而權歸三家

內取邑悉書也於是

取鄭不書取邑不足詳也由是取鄭匡不書

定六年

取

晉蒲棘不書

哀元年

戊子晉侯彪卒九月叔孫婁如晉葬晉平公十有二月

甲子宋公成卒

十有一年春王二月叔弓如宋葬宋平公夏四月丁巳

楚子虔誘蔡侯般殺之于申

諸侯之罪非滅同姓不名

據邾文公
用鄆子

楚虔何以名以

夷狄殺中國甚矣蔡般夫人之所得討也則曷為謂
之夷狄殺中國楚子假大義以號于天下放陳公子
殺蔡侯於是滅陳蔡是謂之討賊歟殺中國之君大
夫歟國君見殺恒不名

據戎蠻
子鄆子

蔡侯何以名自楚商

臣而下弑父無討者必若蔡般殺以他故而後見焉
爾是故宜不名名之雖若蔡般殺以他故而後見則

猶曰蔡侯而已矣

楚公子棄疾帥師圍蔡

滅不言圍此其言圍何以病晉也韓起合九國之大
夫子厥愁以謀救蔡而蔡卒滅於楚言圍所以病晉
也前年棄疾奉孫吳圍陳已而滅陳則曷為不於此
焉病晉合九國于厥愁而不能師甚矣

五月甲申夫人歸氏薨大蒐于比蒲仲孫矍會邾子盟
于侵祥秋季孫意如會晉韓起齊國弱宋華亥衛北宮

佗鄭罕虎曹人杞人于厥慙九月己亥葬我小君齊歸
冬十有一月丁酉楚師滅蔡執蔡世子有以歸用之
滅而以歸未有言執者言執弗臣之之辭也是故均
之為滅國也嘗臣之矣書曰以沈子嘉歸殺之未嘗
臣之也書曰執蔡世子有以歸用之

十有二年春齊高偃帥師納北燕伯于陽

于陽內弗受也衛侯朔入衛不言納納頃子不言奔
奔且言納者北燕伯款衛世子蒯聵也是內弗受之

辭也

三月壬申鄭伯嘉卒夏宋公使華定來聘公如晉至河
乃復五月葬鄭簡公楚殺其大夫成熊秋七月冬十月
公子慙出奔齊

奔辭有三公孫敖如京師不至而復丙戌奔莒未將
命之辭也公孫歸父如晉歸父還自晉至笙遂奔齊
復命之辭也慙與南蒯謀季氏告公而退從公如晉
南蒯以費叛慙還及郊未復命聞亂遂奔齊季氏之

出其君有以也則慙有奔焉爾

楚子伐徐晉伐鮮虞

從穀梁

外晉也晉主諸夏之盟春秋之外秦以晉故也外鄭亦以晉故也則其外晉何晉之君卿無中國之志也楚虔弑君之賊也而執齊慶封放陳招殺蔡侯般假討賊之名以盟諸夏而晉連年有事于狄鮮虞吳入郢於越入吳晉猶圍鮮虞也詳於狄事而不詳于楚則晉無中國之志也於是外晉是故自成襄之春秋

晉雖或競於楚略之不書也而敗狄于交剛于大鹵
滅赤狄潞氏滅赤狄甲氏及留吁則詳志之而滅肥
不書滅鼓不書莫重於外晉苟外晉矣餘不足書也
十有三年春叔弓帥師圍費

內不言叛言圍皆叛也

夏四月楚公子比自晉歸于楚弑其君虔于乾谿楚公
子棄疾殺公子比

公子比何以言歸自晉比亡公子爾靈王之弑棄疾

為之比立而君弑則比蒙首惡之名凡討賊恒稱
人比蒙首惡之名則殺之宜稱人則曰楚公子棄疾
殺公子比何靈王之弑棄疾為之也則是以公子殺
公子耳非討賊也書弑其君比則比疑于齊舍書楚
人殺比則棄疾疑于石碣雍廩不然是兩下之獄勿
書可也春秋之修辭謹矣

秋公會劉子晉侯齊侯宋公衛侯鄭伯曹伯莒子邾子
滕子薛伯杞伯小邾子于平邱

晉復合諸侯也晉之合諸侯由是止鄆陵之後參盟
復作晉非盟主矣

八月甲戌同盟于平邱公不與盟

會於沙隨不見公則譏不在魯也於是邾子貜子翬
魯于晉晉侯不見公書曰公不與盟譏魯之辭也向
也黑壤公不與盟則諱不書盟今也不諱則譏魯之
辭也於溴梁於祝柯嘗為魯執邾貜矣而魯亟出師
又納其叛人於是邾貜翬於晉晉為有辭於魯也而

公遂不盟晉之不自強於主盟由重邱而後皆大夫
爾以晉之不自強於主盟而復合諸侯於是劉子臨
之叔向請之諸夏猶有屬焉而齊人不可鄭人爭承
魯人不與盟而列國之君大夫旅見於楚則晉之合
諸侯由是止鄆陵之後參盟復作則魯誠與有譏焉
爾譏魯所以徧刺天下之諸侯也

晉人執季孫意如以歸公至自會蔡侯廬歸于蔡陳侯
吳歸于陳

於是楚平王封陳蔡而復之隱太子之子廬歸于蔡
悼太子之子吳歸于陳則其書曰陳侯蔡侯歸何不
予楚專封也歸辭有三突歸于鄭篡公子之辭也蔡
季自陳歸于蔡宜得國公子之辭也衛侯鄭歸于衛
嘗失國之君之辭也此未嘗有國也使之如失國辭
然者不與楚專封也

從穀梁

冬十月葬蔡靈公公如晉至河乃復吳滅州來

十有四年春意如至自晉

大夫不致

穀梁例

必見執也而後至亦危之也

二月曹伯滕卒夏四月秋葬曹武公八月莒子去疾卒冬莒殺其公子意恢

莒子卒郊公不感國人欲立莒子之弟庚輿蒲餘侯惡意恢而善於庚輿殺意恢逆庚輿於齊莒無大夫書殺意恢以非其罪也於是郊公奔齊庚輿虐而好劍立十年國人逐之齊人納郊公而郊公出入皆不書則亦非其罪也以不罪莒郊公知鄭忽衛蒯聩之

所以書也

十有五年春王正月吳子夷末卒二月癸酉有事于武宮籥入叔弓卒去樂卒事夏蔡朝吳出奔鄭六月丁巳朔日有食之秋晉荀吳帥師伐鮮虞

嘗外晉矣則荀吳何以無貶於初伐貶餘實錄而已爾

冬公如晉

十有六年春齊侯伐徐楚子誘戎蠻子殺之

公羊有傳

戎蠻子嘉也不名名之則疑於蔡侯般

范甯楚子不名非中國故

夏公至自晉秋八月己亥晉侯夷卒九月大雩季孫意如如晉冬十月葬晉昭公

十有七年春小邾子來朝夏六月甲戌朔日有食之秋邾子來朝八月晉荀吳帥師滅陸渾之戎

自是凡滅不復稱人矣滅不書大夫者吳也吳無大夫也

冬有星孛于大辰楚人及吳戰于長岸

此楚令尹陽句也書人吳公子光也書國略之也楚之君大夫不見於春秋者十八年而吳入郢矣昭公之春秋莫辨於吳楚也五年吳嘗敗楚于鵲岸不書六年敗楚于房鍾不書書伐吳而已於是始書戰則以吳楚敵言之也

十有八年春王三月曹伯須卒夏五月壬午宋衛陳鄭災

公羊有傳

六月邾人入郕秋葬曹平公冬許遷于白羽

十有九年春宋公伐邾夏五月戊辰許世子止弑其君

買

殷梁有傳

弑君天下之大惡也許悼公癰飲太子止之藥而卒
太子奔晉則其曰弑其君何春秋嘗斷斯獄矣于魯
曰公薨夫人姜氏孫於邾於莒曰莒弑其君密州莒
展輿出奔吳則二君之罪人得矣止不嘗藥悼公飲
焉而卒則世子何罪弑君天下之大惡也而加諸無
罪之子曰將為後人戒何以為春秋然則世子果何
罪悼公癰飲世子止之藥而卒世子奔晉世子誠不

嘗藥爾何罪而奔晉春秋有以斷斯獄矣止不書奔
舉重也公薨莒弑其君密州二君之罪人未知其為
誰也夫人孫于邾展輿出奔吳則罪人斯得曰世子
止弑其君不言奔可也

己卯地震秋齊高發帥師伐莒冬葬許悼公

凡異邦人殺吾君書葬

據魯桓公

盜殺其君書葬

據蔡昭公

此

世子弑君也而亦書葬世子貴之至而與盜同文親
之至而與異邦人同文春秋之惡惡未有甚於此者

也

二十年春王正月夏曹公孫會自鄆出奔宋

穀梁有傳

秋盜

殺衛侯之兄縶

此齊豹也則曷為以賤辭書之奪之司寇則非大夫也盜賤者也以賤者而殺其君兄於是衛侯如死鳥則衛之失政甚矣

冬十月宋華亥向寧華定出奔陳

於是公子城公孫忌八子奔鄭華亥向寧華定奔陳

則其但書三子何凡奔罪也衆不可以勝罪則罪其甚焉者爾入南里以叛乞師於楚為宋患之日久是以甚三子也

十有一月辛卯蔡侯廬卒

二十有一年春王三月葬蔡平公夏晉侯使士鞅來聘宋華亥向寧華定自陳入于宋南里以叛

於是晉荀吳齊苑何忌衛公子朝救宋圍華氏於南里而華氏乞師於楚諸侯之戍出之不書圍宋南里

不以討叛予晉也

秋七月壬午朔日有食之八月乙亥叔輒卒冬蔡侯朱出奔楚公如晉至河乃復

二十有二年春齊侯伐莒宋華亥向寧華定自宋南里出奔楚

再奔不書

據齊慶封來奔齊人來讓奔吳定十四年衛公孟彊奔鄭自鄭奔齊之類

必嘗

入叛也而後書晉藥盈鄭良霄猶及殺之矣書奔言

佚賊也書奔猶可也書歸

據定十三年晉趙鞅

甚矣

大蒐于昌間夏四月乙丑天王崩六月叔鞅如京師葬
景王王室亂

周亂不書

據子頽
子帶

書王室亂則天下無人紀矣昔者

惠襄之世子頽亂鄭虢討之子帶亂晉討之春秋不
書猶有臣子焉耳於是景王崩悼王即位既葬矣子
朝欲篡子猛而立凡歷悼敬五年而後定而訖於供
賊則天下無人紀矣

劉子單子以王猛居于皇

以武氏子毛伯不稱使則王在喪雖踰年猶未稱王也

本公羊文九年傳

此爭立也則其遂稱王何成猛之為王

也景王崩太子壽早卒猛勾其母弟也而王愛庶子朝欲立之於是單劉奉猛尹召奉朝未知其誰宜立也成猛之為王則猛宜立者也是故春秋之誼苟宜立也則糾雖未得國成之為子糾猛雖未得京師成之為王猛

秋劉子單子以王猛入于王城

居于皇言失京師也入于王城言始得京師也凡以
非順辭也以虢公鄭伯晉侯不書以則非子二子也
非子二子是單旗劉蚩以大夫專廢置君也以大夫
專廢置君則曷為無貶前言王室亂後言二子以王
猛居于皇入于王城則二子有不得已焉者爾而非
其罪也然則以單劉為功不逮鄭虢則可以為罪則
溢罰矣是故殺子朝於楚儋翩率子朝之徒以作亂
敬王嘗處於姑猶逾年卒克之子朝不書殺天王不

書出是子單劉以復辟之誼也

子朝事在定六年

冬十月王子猛卒

有傳

猛謚曰悼王則其曰王子猛卒何未逾年也未逾年

之君雖嘗有謚猶不列于廟次是故衛侯申

據詩歸唁衛侯

雖謚曰戴公猛雖謚曰悼王均之為不成君也王猛

矣其列曰王子猛何於其卒從其恒稱爾春秋之誼

苟廢立也足以亂名實則不可弗辨苟非廢立也無

亂於名實則弗辨也是故成之為君則稱王猛於其

卒也從其恒稱為王子猛不成之為君則稱鄭忽於其歸也從其恒稱為世子忽義不在焉則不沒其實而已矣

十有二月癸酉朔日有食之

二十有三年春王正月叔孫婼如晉癸丑叔鞅卒晉人執我行人叔孫婼

有傳

晉人圍郊

郊天子之邑也向者子帶之亂晉文公嘗圍溫矣不書以其討亂也圍郊以伐子朝之黨也則何以書討

亂非晉志也於是王師敗于郊王猛卒敬王即位矣
而籍談荀躒之師軍于陰于侯氏于谿泉次于杜逾
年子朝立焉而後圍郊則討亂非晉志也是圍天子
之邑而已矣是故晉自交剛之役凡師書君大夫復
貶人之

夏六月蔡侯東國卒于楚秋七月莒子庚輿來奔戊辰
吳敗頓胡沈蔡陳許之師于雞父胡子髡沈子逞滅獲
陳夏齧

外域交相敗不書必敗中國而後書吳敗頓胡沈蔡
陳許自入春秋未之有也是故吳子貶稱國

天王居于狄泉

于狄泉言未得京師也於是王猛卒敬王即位毋弟
勾也館于子旅氏謂之東王子朝謂之西王書曰天
王居于狄泉黜子朝也

尹氏立王子朝

此尹圉也

尹文公

曷為稱尹氏亦非見大夫也於是敬

王即位矣子朝入于尹尹圉為之殺劉佗召伯與南宮極以成周人戍尹子朝入于王城則曷為但言尹氏猶曰獨尹氏所欲立也將以王天下獨尹氏立之則莫之與矣王子不名據王季子唯卒名之非卒也而名之者貶之也是故救衛名子突奔名子瑕立名子朝

王札子闕據傳王子捷也

八月乙未地震冬公如晉至河有疾乃復

二十有四年春王二月丙戌仲孫貜卒姑至自晉有傳夏

五月乙未朔日有食之秋八月大雩丁酉杞伯郁釐卒
冬吳滅巢葬杞平公

二十有五年春叔孫婼如宋夏叔詣會晉趙鞅宋樂大
心衛北宮喜鄭游吉曹人邾人滕人薛人小邾人于黃
父

傳曰謀王室也於是天王謂之東王子朝謂之西王
晉侯使涖問周故期以明年而後為黃父之會又明
年而荀躒趙鞅之師出是故天王書出入而晉師克

鞏不書書克鞏是討子朝也

有鸛鵒來巢

有傳

秋七月上辛大雩季辛又雩九月己亥

公孫于齊次于陽州

公行書次自莊以來未之有也于是再見其再見何以昭公之失國不可不詳其所如往也

齊侯唁公于野井冬十月戊辰叔孫婼卒十有一月己亥宋公佐卒于曲棘十有二月齊侯取鄆

外取邑不書雖取諸我不書取鄆將以居公也則何

以書病齊侯也昭公孫於齊齊侯將納公以梁邱據一言而遂不果鄆陵之盟將以合諸侯云爾而徒曰納公三年而無成則是取鄆而已矣是故取鄆則書齊圍成則書公

二十有六年春王正月葬宋元公三月公至自齊居于鄆夏公圍成秋公會齊侯莒子邾子杞伯盟于鄆陵

此參盟也參盟自齊桓以來未之有也於是再見其再見何晉不復主盟矣齊徐鄭莒嘗盟於蒲隧

事在十六

年宋邾鄉徐嘗盟於蟲

事在十年傳

則諸侯有不待伯主

而自盟會久矣于是始書以晉之不復主盟也晉不復主盟而後齊專盟矣

公至自會居于鄆九月庚申楚子居卒冬十月天王入于成周

言始得京師也昔者惠王出入皆不書襄王雖書出猶不書入也於是悼王自皇敬王自狄泉則曷為皆書入幸之也王室亂矣入無足諱焉爾于成周猶未

得王都也

尹氏召伯毛伯以王子朝奔楚

尹氏獨欲立子朝耳則其奔楚曷為無言召伯毛伯敬王在外四年而後入則二子為之也然則曷為不以二子者首惡以二子首惡是有奉子朝者矣皆卿士也單劉奉猛毛召奉朝將又莫知其誰宜立也是故終始于尹氏以二卿序尹氏之下則從之者而已

據傳二十三年子朝入于王城二十四年召簡公以甘桓公見子朝

二十有七年春公如齊公至自齊居于鄆夏四月吳弑其君僚

吳子孰弑吳公子光也夫稱國以弑必貴戚也則嘗有廢立者也庶其絀長密州絀少光徒以篡焉爾則何以稱國於是壽夢有四子而季子賢謁也餘祭也夷昧也不以國與子而與弟凡為季子也季子不受則國宜之光者僚越光而代札是自禍也父子兄弟苟焉以其位為利至于相戕賊也天理絕矣是故賊

不書主名以是為有國者大戒彼又何誅焉

楚殺其大夫卻宛秋晉士鞅宋樂祁犁衛北宮喜曹人邾人滕人會于扈

外大夫自為會

冬十月曹伯午卒邾快來奔公如齊公至自齊居于鄆
二十有八年春王三月葬曹悼公公如晉次于乾侯夏
四月丙戌鄭伯寧卒六月葬鄭定公秋七月癸巳滕子
寧卒冬葬滕悼公

二十有九年春公至自乾侯居于鄆齊侯使高張來唁
公公如晉次于乾侯夏四月庚子叔詣卒秋七月冬十

月鄆潰

三十年春王正月公在乾侯

有傳

夏六月庚辰晉侯去疾

卒秋八月葬晉頃公冬十有二月吳滅徐徐子章羽奔

楚

奔非其罪莫甚于被兵者也雖不死社稷猶不名也
則其名徐子何臣吳而後奔也滅國有三辭以歸臣

之之辭也奔猶弗臣之之辭也不言歸若奔死之之辭也是故奔者不必名以歸也而後名之於是吳滅徐徐子斷其髮攜其夫人以逆吳子吳子唁而送之遂奔楚徐子而不名則疑于譚子弦子溫子矣

三十有一年春王正月公在乾侯有傳季孫意如會晉荀

躒于適歷

季氏出其君而納邾快又納黑肱卒大夫會葬晉宋滕薛晏然如二君矣君在外雖卿有事不書必有諸

侯之事而後書是故文公在晉公孫敖會于垂隴襄公在晉季孫宿會于邢邱皆伯令也昭公在乾侯季孫意如會晉荀躒于適歷非諸侯之事也則何以書以晉之釋君而助臣也晉士鞅會諸侯之大夫于扈將以納公取貸于季孫而遂不果荀躒復為此會昭公所以死於外也襄昭之際大夫無君之禍晉人為之也公會晉侯於夷儀衛侯入于夷儀甯喜弑其君剽公如晉次于乾侯公在乾侯季孫意如會晉荀

蹠于適歷公薨于乾侯皆罪晉之辭也

夏四月丁巳薛伯穀卒

有傳

晉侯使荀蹠唁公于乾侯秋

葬薛獻公冬黑肱以濫來奔

有傳

傳曰邾黑肱也其不繫之邾濫嘗自別二君也圍戚
不曰圍衛戚取鄆不曰取我鄆皆如于邾之辭也

十有二月辛亥朔日有食之

三十有二年春王正月公在乾侯

有傳

取闕夏吳伐越秋

七月冬仲孫何忌會晉韓不信齊高張宋仲幾衛世叔

申鄭國參曹人莒人薛人杞人小邾入城成周

諸侯有事于京師皆不書

隱六年僖二十八年獻捷之類

戍之不書

據僖十三年十四年傳

城之不書

二十四年城郊

以是為常事也書城

成周則請而後城之是非常也是役也晉魏舒南面韓不信專執于京師宋仲幾不受功齊高張後大夫之無王甚矣然則大夫何以無貶於澶淵貶亦實錄而已矣

十有二月己未公薨于乾侯

有傳

春秋後傳卷十

欽定四庫全書

春秋後傳卷十一

宋 陳傅良 撰

定公

元年春王三月晉人執宋仲幾于京師

穀梁有傳

夏六月癸

亥公之喪至自乾侯戊辰公即位秋七月癸巳葬我君

昭公

胡氏從馮山以從祀先公為祔祭昭公據葬稱諡不應不祔廟今不取

九月大雩立

煬宮冬十月隕霜殺菽

二年春王正月夏五月壬辰雉門及兩觀災秋楚人伐

吳

此囊瓦也貶人之

冬十月新作雉門及兩觀

三年春王正月公如晉至河乃復二月辛卯邾子穿卒
夏四月秋葬邾莊公冬仲孫何忌及邾子盟于拔

四年春王二月癸巳陳侯吳卒三月公會劉子晉侯宋
公蔡侯衛侯陳子鄭伯許男曹伯莒子邾子頓子胡子
滕子薛伯杞伯小邾子齊國夏于召陵侵楚

傳曰劉文公合諸侯于召陵謀伐楚也晉之合諸侯至平邱而止則是役劉子為之也劉子定內難復辟于周而楚納子朝於是合十八國之師伐楚雖五伯未有盛於此時者也以周之不競而能合諸侯盛於五伯俄而劉子卒君子蓋深悲之也

夏四月庚辰蔡公孫姓帥師滅沈以沈子嘉歸殺之五月公及諸侯盟于臯鼬杞伯成卒于會

有晉侯在何以書公及諸侯盟非晉主盟也公會諸

侯盟于薄公會諸侯盟于宋皆後至之文也非後至也而曰公及諸侯盟則以魯主之也是故書及劉卷卒諸侯無會同於是有特相盟者矣

六月葬陳惠公許遷于容城秋七月公至自會劉卷卒

王卿士不卒

據成十三年成肅公昭十一年單成公

有關於天下之故

則卒之於襄王之難有王子虎焉於敬王之難有劉子焉君子曰王室其庶幾乎而無救于周是故特卒之也司馬遷於諸國世家多缺卒而卒孔子蓋知此

者也

葬杞悼公楚人圍蔡晉士鞅衛孔圉帥師伐鮮虞葬劉
文公冬十有一月庚午蔡侯以吳子及楚人戰于柘舉
楚師敗績

於是蔡侯如晉請伐楚晉辭蔡侯天下諸侯莫與憂
蔡者而愬之吳吳子興師以伐楚是則吳知憂中國
也是故吳始稱子書戰書敗績皆進吳也而楚囊瓦
貶稱人

楚囊瓦出奔鄭庚辰吳入郢

公穀有傳

入國不言邑入楚也而曰入郢非得國之辭也是役也鬬辛王孫由于王孫圉鍾建鬬巢申包胥王孫賈宋木鬬懷皆悉宣力焉秦師救楚楚子入于郢則楚為有人矣書入郢非得國之辭也前曰吳子今曰吳復從其舊號也舍黃池書吳而已

五年春王三月辛亥朔日有食之夏歸粟于蔡於越入

吳

向曰越人今日於越復從其舊號也越未有聞也昭

定之春秋吳楚爭而後越入中國會于瑣也

昭五年

越

常壽過始見於經而亟稱人後三十年而入吳不復

稱人矣晉楚之初春秋未以敵言之戰于邲也則楚

稱子矣吳楚之初春秋未以敵言之戰于柘舉也則

吳稱子矣至於吳越終春秋不以敵言之也是故越

入吳書吳入越不書

哀元年

六月丙申季孫意如卒秋七月壬子叔孫不敢卒冬晉

士鞅帥師圍鮮虞

六年春王正月癸亥鄭游速帥師滅許以許男斯歸二月公侵鄭公至自侵鄭

自宣之季年凡伐不言公魯無君將者八十年矣至是而書侵鄭則以公山不狃侯犯陽虎之專也故曰政逮於大夫四世矣故夫三桓之子孫微矣

夏季孫斯仲孫何忌如晉秋晉人執宋行人樂祁犁冬城中城季孫斯仲孫何忌帥師圍鄆

七年春王正月夏四月秋齊侯鄭伯盟于鹹

此特相盟也特相盟自齊桓以來未之有也於是再見其再見何諸侯無主盟矣是故石門志諸侯之合也鹹志諸侯之判也

齊人執衛行人北宮結以侵衛齊侯衛侯盟于沙大雩齊國夏帥師伐我西鄙九月大雩冬十月

八年春王正月公侵齊公至自侵齊二月公侵齊三月公至自侵齊曹伯露卒夏齊國夏帥師伐我西鄙公會

晉師于瓦公至自瓦

不曰會士鞅曰會晉師重師也鞏之戰公會晉師于上鄆不書諱之也四卿並將而以禽鄭自師逆公三家之張成於此矣故諱之也於是齊師伐我晉士鞅趙鞅荀寅救我公會晉師于瓦勿諱可也

秋七月戊辰陳侯柳卒晉士鞅帥師侵鄭遂侵衛

此其言遂何晉始伐與國也於襄之二十三年齊始叛晉取朝歌去年鄭始叛晉盟齊于鹹衛始叛晉盟

于沙於是侵鄭衛又明年及齊平雖魯亦叛晉矣故
悉書之也

葬曹靖公九月葬陳懷公季孫斯仲孫何忌帥師侵衛
冬衛侯鄭伯盟于曲濮從祀先公盜竊寶玉大弓

於是禘于僖公不書書從祀先公非常也順祀則曷
為謂之非常陽虎欲去三桓而為此也陽虎欲去三
桓是以陪臣廢置大夫也虎陪臣也欲廢置三卿而
追正宗廟之禮已而弗勝取周公之分器以出曾莫

之禁者書曰從祀先公盜竊寶玉大弓魯無人之辭

也是故陪臣叛皆不書

據昭二十二年南蒯以費叛定十三年晉趙稷涉賓以邯

鄆叛之類

書陽虎為盜是治陪臣也君子之作春秋治至

於陪臣斯極矣

見公羊

九年春王正月夏四月戊申鄭伯蠆卒得寶玉大弓六

月葬鄭獻公秋齊侯衛侯次于五氏

外會書次自厥貉以來未之有也於是再見其再見何中國無伯也齊衛伐盟主則其不書伐何春秋重

絕晉也於襄之二十三年嘗書齊伐晉至是而不書何齊始叛晉諸侯猶有盟主也前年鄭叛晉盟齊于鹹衛叛晉盟齊于沙明年及齊平魯亦叛晉諸侯無盟主矣有盟主非美事也無盟主非細故也是故春秋重絕晉也

秦伯卒冬葬秦哀公

十年春王三月及齊平夏公會齊侯于夾谷公至自夾谷晉趙鞅帥師圍衛齊人來歸鄆謹龜陰田叔孫州仇

仲孫何忌帥師圍郕

未有言來歸田者言來歸必自外至者也

據鄭來歸
祊及齊來

歸衛實
之類

鄆謹龜陰田言來歸以是為齊人之願也濟

西言取謹闡言取鄆謹龜陰之田不言取以是為齊

人之願則猶齊田也

何休從外來常文與
齊人來歸衛實同

齊強於天

下伐盟主合諸侯于鄆陵矣於是願歸田則以孔子
相夾谷之會也謂春秋之諸侯不足用為善者是不
即人心者之論也故曰如有用我者期月而已可也

秋叔孫州仇仲孫何忌帥師圍郕宋樂大心出奔曹宋公子地出奔陳冬齊侯衛侯鄭游速會于安甫叔孫州仇如齊宋公之弟辰暨仲佗石彊出奔陳

十有一年春宋公之弟辰及仲佗石彊公子地自陳入于蕭以叛夏四月秋宋樂大心自曹入于蕭冬及鄭平傳曰始叛晉也書輸平以志諸侯之合書及鄭平以志諸侯之散此春秋之所以終始也

叔還如鄭泣盟

十有二年春薛伯定卒夏葬薛襄公叔孫州仇帥師墮
郈

郈叔孫之邑也費季孫之邑也叔孫州仇墮郈季孫
斯墮費以是為二家之願也三家專魯出昭公矣於
是願墮其都則以孔子之相魯也謂春秋之大夫不
足用為善者是不即人心者之論也故曰如有用我
者朞月而已可也

衛公孟彊帥師伐曹季孫斯仲孫何忌帥師墮費秋大

雩冬十月癸亥公會齊侯盟于黃十有一月丙寅朔日
有食之公至自黃十有二月公圍成公至自圍成

成孟孫之邑公行不越竟不書至至圍成危之也初
作三軍也三分公室而各有其一季氏盡征之叔孫
氏臣其子弟孟氏取其半焉三家之強孟氏為猶有
君也莫難於墮郈費成墮易耳而公自將圍成弗克
是不足與有為也齊人歸女樂三日不朝是以微罪
行也

十有三年春齊侯衛侯次于垂葭夏築蛇淵固大蒐于比蒲衛公孟彊帥師伐曹秋晉趙鞅入于晉陽以叛冬晉荀寅士吉射入于朝歌以叛

荀寅士吉射伐趙氏鞅奔晉陽韓魏伐范中行氏寅吉射奔朝歌鞅非始禍者也則曷為皆以叛書之春秋之季家有藏甲都邑皆百雉之城矣鞅必奔晉陽寅吉射必奔朝歌則是皆叛也

晉趙鞅歸于晉

歸不言自鞅無所自也歸易辭也藥盈魚石猶言入至鞅而後言歸則晉無人之辭也此韓趙魏分晉之本也叛臣至於書歸則佚賊不足錄矣此韓魏趙分晉之本也

薛弒其君比

十有四年春衛公叔戌來奔衛趙陽出奔宋二月辛巳楚公子結陳公孫佗人帥師滅頓以頓子牂歸夏衛北宮結來奔五月於越敗吳于檣李吳子光卒

光嘗弑君矣其君稱國以弑而光書卒何他君無貶焉然則光無罪歟以莒展輿之罪不著于春秋而逾年不成君則光罪不容誅矣

公會齊侯衛侯于牽公至自會秋齊侯宋公會于洮天王使石尚來歸脤衛世子蒯聵出奔宋衛公孟彊出奔鄭宋公之弟辰自蕭來奔大蒐于比蒲邾子來會公

會公於比蒲也

從穀梁范甯注

自舍中軍公不與兵政者四

十年矣於是蒐比蒲則以季孫斯叔孫州仇之墮費

郈也故曰政逮于大夫四世矣故夫三桓之子孫微矣

城莒父及霄

十有五年春王正月邾子來朝鼯鼠食郊牛牛死改卜
牛二月辛丑楚子滅胡以胡子豹歸夏五月辛亥郊壬
申公薨于高寢鄭罕達帥師伐宋齊侯衛侯次于渠蔭
邾子來奔喪

諸侯來奔喪於是始

秋七月壬申妣氏卒

左氏公羊有傳

八月庚辰朔日有食之九

月滕子來會葬丁巳葬我君定公雨不克葬戊午日下

昃乃克葬辛巳葬定妣

妾母也自成風訖於宣襄子苟為君則其母為夫人
子嘗為君不敢以其母為夫人者隱公而已矣是故
聲子不葬聲子不葬葬定妣則是哀公之以夫人喪
其母猶宣襄也哀公之喪其母猶宣襄也則何以卒
不稱夫人葬不稱小君徒以喪在殯不及尊其母焉

耳

冬城漆

春秋後傳卷十一

欽定四庫全書

春秋後傳卷十二

宋 陳傅良 撰

哀公

元年春王正月公即位楚子陳侯隨侯許男圍蔡

鄭滅許矣其再見何復正也復正有三辭莫善於自

尅復者也是故襄王嘗書出已而書王

事在僖二十八年

則

愈於敬王書入矣許嘗書滅已而書許男則愈于陳

蔡書歸矣春秋善復正襄王許男則善之善者也

何休

自復無
惡文

饑鼠食郊牛改卜牛夏四月辛巳郊秋齊侯衛侯伐晉
伐夷儀不書書次五氏伐河內不書書次垂葭公會
齊衛于牽帥狄師襲晉戰于絳中猶不書也諸夏之
無君春秋誠有不忍書也必於是而後書春秋蓋將
終焉是故春秋之初諸侯無王者齊鄭宋魯衛為之
也春秋之季諸侯無伯者亦齊鄭宋魯衛為之也
冬仲孫何忌帥師伐邾

二年春王二月季孫斯叔孫州仇仲孫何忌帥師伐邾
取漵東田及沂西田癸巳叔孫州仇仲孫何忌及邾子
盟于句繹

自是內外盟皆不書不足書也是故鄆衍盟吳不書

^七萊門盟吳不書^八年甚者會于鄆雖三國盟亦不書

十二年杜氏
二說皆非是

夏四月丙子衛侯元卒滕子來朝晉趙鞅帥師納衛世

子蒯聵于戚

于戚內弗受也輒拒父也後十二年而蒯賸自戚入于衛衛侯輒來奔則是輒拒父也世子正也屬辭比事則輒萬世不可掩矣

秋八月甲戌晉趙鞅帥師及鄭罕達帥師戰于鐵鄭師敗績冬十月葬衛靈公十有一月蔡遷于州來蔡殺其

大夫公子駟

三年春齊國夏衛石曼姑帥師圍戚

穀梁有傳

夏四月甲午

地震五月辛卯桓宮僖宮災季孫斯叔孫州仇帥師城

啓陽宋樂髡帥師伐曹秋七月丙子季孫斯卒蔡人放其大夫公孫獵于吳冬十月癸卯秦伯卒叔孫州仇仲孫何忌帥師圍邾

四年春王二月庚戌盜殺蔡侯申

此公孫翩也書曰盜則疏且賤焉者也公孫也苟不在其位則疏且賤者也盜殺其君則貴近無人矣春秋書殺大夫莫甚於宋昭晉厲也而二君或稱人以弑人衆辭也甚者稱國焉則凡有官者無人也有稱

盜焉則凡在官者無人也蔡殺其大夫公子駟蔡放其大夫公孫獵于吳葺爾蔡也連年誅放其大夫是貴近無人也是故殺翩不書以為不足討也葬昭公以為不必不葬也

蔡公孫辰出奔吳

書公薨夫人姜氏孫于邾公子慶父出奔莒則夫人慶父與聞乎弑矣書盜殺蔡侯申蔡公孫辰出奔吳則辰與聞乎殺矣

葬秦惠公宋人執小邾子夏蔡殺其大夫公孫姓公孫
霍晉人執戎蠻子赤歸于楚城西郭六月辛丑亳社災
秋八月甲寅滕子結卒冬十有二月葬蔡昭公葬滕頃
公

五年春城毗夏齊侯伐宋晉趙鞅帥師伐衛秋九月癸
酉齊侯杵臼卒冬叔還如齊閏月葬齊景公

六年春城邾瑕晉趙鞅帥師伐鮮虞吳伐陳夏齊國夏
及高張來奔

齊殺其大夫高厚齊崔杼弑其君光齊國夏及高張來奔齊陳乞弑其君荼聖人之垂戒深矣

叔還會吳于柰秋七月庚寅楚子軫卒齊陽生入于齊衛侯入于夷儀衛甯喜弑其君剽則喜為衛侯弑也齊陽生入于齊齊陳乞弑其君荼則乞為陽生弑也齊陳乞弑其君荼

荼之弑得國者陽生也曷為不以罪齊無知者罪陽生於是齊政由陳氏矣政由陳氏彼陽生者亡公子

而已乞不有無君之心則陽生為僇矣

陽生也以下從穀梁

冬仲孫何忌帥師伐邾宋向巢帥師伐曹

七年春宋皇瑗帥師侵鄭晉魏曼多帥師侵衛夏公會吳于鄆秋公伐邾八月己酉入邾以邾子益來宋人圍曹冬鄭駟弘帥師救曹

書救曹何曹卒滅於宋也自魯救晉凡晉楚之救皆不書六十年矣其再見以中國無伯而諸侯自相救也諸侯自相救猶可也吳救陳諸夏亦幾於亡矣

八年春王正月宋公入曹以曹伯陽歸

檜亡東周之始也曹亡春秋之終也夫子之刪詩也
繫曹檜於國風之後於檜之卒篇曰思周道也傷天
下之無王也於曹之卒篇曰思治也傷天下之無伯
也春秋作於定哀之際文武之所衰大諸侯亡國多
矣莫強於齊晉晉趙鞅歸于晉則晉亡之漸也齊陳
乞弒其君荼則齊亡之漸也夫子嘗喟然于此矣興
滅國繼絕世修廢官舉逸民蓋嘗有此言也於是曹

不言滅

吳伐我夏齊人取讎及闡歸邾子益于邾秋七月冬十
有二月癸亥杞伯過卒齊人歸讎及闡

九年春王二月葬杞僖公宋皇瑗帥師取鄭師于雍邱
夏楚人伐陳秋宋公伐鄭冬十月

十年春王二月邾子益來奔

此吳人討邾奉太子革為政而後奔則其但書奔何
以是為自失國也春秋之治苟其道足以失國雖有

敵國猶以自致之文書之

公會吳伐齊三月戊戌齊侯陽生卒夏宋人伐鄭晉趙
鞅帥師侵齊五月公至自伐齊葬齊悼公衛公孟彊自
齊歸于衛薛伯夷卒秋葬薛惠公冬楚公子結帥師伐
陳吳救陳

延州來季子也但書吳不以救陳錄季子也自魯救
晉凡救皆不書矣鄭救曹則中國無伯諸侯自相救
也中國無伯諸侯自相救春秋憫焉而特書之吳救

陳諸夏幾于亡矣春秋之所甚懼也書吳而已譏不
在季子也

十有一年春齊國書帥師伐我夏陳轅頗出奔鄭五月
公會吳伐齊甲戌齊國書帥師及吳戰于艾陵齊師敗
績獲齊國書秋七月辛酉滕子虞母卒冬十有一月葬
滕隱公衛世叔齊出奔宋

十有二年春用田賦

以邱賦一乘為未足又以田賦之也故曰斂從其薄

以邱亦足矣田賦之也者家一人也家一人管子內

政之法也諸侯之益兵自齊始晉次之

事在僖十五年

春秋

之季魯亦行之矣是故作邱甲用田賦不書初

夏五月甲辰孟子卒

三傳同

公會吳于橐臯秋公會衛侯

宋皇瑗于鄆宋向巢帥師伐鄭冬十有一月螽

十有三年春鄭罕達帥師取宋師于岳夏許男成卒公

會晉侯及吳子于黃池

公羊有傳


於是盟不書吳晉之盟春秋終諱之不以吳晉同主

盟也公會晉侯及吳子雖兩伯之辭也而春秋終不以吳晉同主盟也單平公不書不忍書也春秋公萬世之是非亦有所不忍書歟交質子事在隱二年僖十七年成二年以兵向京師事在莊十九年僖二十四年魯用人于亳社事在昭十年皆不忍書者也

楚公子申帥師伐陳於越入吳

秋公至自會晉魏曼多帥師侵衛葬許元公九月螽冬十有一月有星孛于東方盜殺陳夏區夫十有二月螽

十有四年春西狩獲麟



春秋後傳卷十二